

# 380 pesawah terjejas akibat El Nino

Bekalan air ke palong kering, IADA terpaksa salur bekalan secara manual guna pam air

■ ARZIANA MOHMAD AZAMAN

**TANJONG KARANG** – Lebih 760 hektar kawasan sawah melibatkan 380 pesawah di Sabak bernaam terjejas apabila bekalan air ke palong kering akibat fenomena El Nino yang melanda negara ini.

Pengarah Kawasan Pembangunan Pertanian Bersepadu (IADA) Barat Laut Selangor, Eliyas Saad menjelaskan, pihaknya terpaksa menyalurkan air secara manual menggunakan 55 pam air dari saliran utama ke dalam palong.

Menurutnya, pihaknya dengan kerjasama Jabatan Pengairan dan Saliran (JPS) dalam proses meningkatkan paras air di dalam palong bermasalah terutamanya di kawasan Pasir Panjang, Sungai Nipah dan Sungai Leman.

“IADA Barat Laut Selangor juga meminta pe-

sawah di kawasan tak terjejas supaya melewati proses penanaman padi dalam tempoh dua minggu bagi memastikan bekalan air mencukupi di ketiga kawasan itu.

“Setakat ini bekalan air terusan utama masih mencukupi,” katanya dalam sesi dialog sempena Program Seminar dan Dialog Isu Industri Padi IADA Barat Selangor yang dirasmikan Pengerusi Majlis Tindakan Persekutuan Selangor, Datuk Seri Noh Omar.

Hadir sama, Ketua Penolong Setiausaha Bahagian Industri Padi dan Beras, Kementerian Pertanian dan Industri Asas Tani, Wan Abdul Hadi Wan Mohd Shafie dan Ketua Wilayah Bernas Sekinchan, Mior Abdul Rahman Mior Adlan.

Eliyas menjelaskan, pihaknya juga dalam proses melantik konsultan untuk mem-



Wan Abdul Hadi (dua, kanan) menjelaskan isu yang dibangkitkan pesawah sempena Program Seminar dan Dialog Isu Industri Padi IADA Barat Selangor, semalam.

buat kajian penstrukturan sistem pengairan air semula di kawasan jelapang padi di negeri ini.

“Tumpuan diberikan di kawasan pengairan tidak sempurna seperti Pasir Panjang, Sungai Nipah dan Sungai Leman,” katanya yang turut mempertimbangkan cadangan penambahan kolam tadah-

an di kawasan sesuai.

Sementara itu, Noh yang juga Ahli Parlimen Tanjong Karang berkata, jaminan gred pemutuan padi yang hanya dipotong di satu pusat belian padi mampu melegakan pesawah ketika musim menuai nanti.

“Tak kira pusat belian padi berdaftar milik keraja-

an mahupun swasta, gred pemutuan padi hanya akan dipotong di satu tempat saja dan Bernas juga bersetuju untuk menjadi pusat belian padi terakhir.

“Setakat ini, gred pemutuan padi dalam 17 peratus sehingga 20 peratus saja dan hasil padi Selangor antara yang terbaik,” katanya yang turut

mencadangkan sistem palong digantikan dengan sistem longkang konkrit.

Mengulas lanjut mengenai isu gred pemutuan padi yang menjadi pertikaian ramai, Wan Abdul Hadi menjelaskan, kerajaan tidak menetapkan gred pemutuan padi itu di pusat belian tertentu.

“Pesawah kena faham gred pemutuan padi ini tidak pernah ditetapkan di mana-mana pusat belian padi dan mungkin ada salah faham sehingga timbul rungutan pesawah.

“Kementerian juga mahu wujudkan peraturan baru kepada pusat belian dan kilang berlesen supaya laksanakan gred secara standard dan tidak menindas pesawah... jika ada berlaku, kita akan ambil tindakan tegas.

“Kita sedang rangka peraturan baru dan mungkin tahun depan boleh dikuatkuasakan,” katanya.